

REGIONAL NEWS

HEADLINES:-

1. MPSC hna lak dana thil fel hlel awm ni a puh chhui chiang tura ruat Pu Michael Lalmanzuala chuan naktuk emaw Thawhlejni-ah emaw hian a report a peih hman a rin thu a sawi.
2. Nizan thim hlima nasa taka rial tla chuan East Phaileng leh a khaw thenawm Pehlawn khua-ah in 169 a deng chhia.
3. Mizoram Lok Sabha bial inthlanna a vote tlate chu district khawpui tina pindan awmkhauh chungah dah luh kim vek a ni tawh.
4. Lok Sabha inthlanpui thawh hnihna atan campaign theih hun ni 4 chauh a awm tawh avangin party tin, thahnemngai takin an campaign.

<><><>

INQUIRY

MPSC hna lak dana thil fel hlel awm ni a puh chhui chiang tura ruat IAS chawl tawh Pu Michael Lalmanzuala chuan naktuk emaw Thawhlejni-ah emaw hian a report a peih hman a rin thu a sawi.

Pu Lalmanzuala chuan an hna hi sorkar pisa kal ni, ni 2 chiah an la khawih hman niin a sawi a. A thil chhui-na-ah hian sorkar chuan amah pui turin deputy secretary pahnih an pek thu leh MINECO a Secretariat-ah pisa tur an ruahmansak thu a sawi a. MPSC a thawkte chawltir rih an nih lai-in an document duh angte pe thei turin thawktu thenkhat chu pisa an kai phalsak a ni, a ti. Report hi thehluh theih thuai a inbeisei thu Pu Lalmanzuala chuan a sawi a ni. Puan tawh angin MPSC-in Combined Civil Service leh sorkar hna dang a lak danah thil fel lo a awm ni a puhin MZP chuan MPSC chairman Pu JC Ramthanga chu bang turin an phut a. A ban loh avangin kar kal ta Thawhtanni atang khan MPSC hnathawkte pisa kal tur an dang a ni.

Pu Lalmanzuala chuan Nilaini leh Ningani chauh kha sorkar pisa kai ni a hna an thawh hun a nih thu a sawi a. Inthlan vote thlak ni, Zirtawpni bakah Inrinni leh Pathianni a tlak leh avangin sorkarin ni 7 chhunga a report thehlut tura a tihna-ah sorkar pisa kai ni, ni 7 a tih kher avangin hun an la neih tam thu a sawi a. Chuti chung chuan tunah hian a report hi a hmawr a bawk thei hnai niin a sawi a ni.

Thawhlejni kalta khan Mizoram sorkara Vigilance Secretary chuan MPSC hna lakna a thil fel lo awm ni a sawi hi chhui chiang turin Chief Secretary hlui, MPSC-a member leh Chairman hna pawh lo thawk tawh Pu Lalmanzuala chu a ruat a. Ni 7 chhunga an thil hmuh dan report thehlut turin tih a ni. Pu Lalmanzuala hi MPSC member-ah kum 4 a awm tawh a, kum 6 chhung chairman hna a chelh bawk a ni.

<><><>

CYMA

Central YMA chuan tun hnai khan Mizorama an sahimna atana awm mek Myanmar, Bangladesh leh Manipur atanga rawn tlanchhiate chu Mizorama an awm chhungin ram dan leh khawtlang inrelbawlina zawm turin a ngen.

Central YMA chuan ram dan leh khawtlang duhdan bawhchhe lo turin raltlan zawng zawng an ngen a. Ram dan kalha sumdawn leh ruihhlo laka inhnamhnawih lo tur leh khua-leh-tui tha tak anga khawsa tura beisei an nih thu an tarlang. Ramdangmite'n sorkar hriatpui leh phalna lo chuan ram leh in an neih theih loh avangin YMA-in hriatpuina a ziah theih loh thu tarlan a ni a. In leh dawr luah man chungchangah mi in leh dawr luah lai a aia luah

man sang zawk emaw a luahlan leh luahsak loh tur a ni. Myanmar leh Bangladesh atanga raltlante hi India mi an nih loh avangin India mi chauhvinn an neih theih Voter ID card, Aadhaar Card, Birth Certificate, Tribal Certificate, Residential Certificate, Indian Driving Licence leh lirtthei registration an tih theih loh tur thu te, Dan phal loh thil leh ruihhlo hmanga sumdawna do kawngah sorkar leh khawtlang an thawhpui tur a ni, an ti bawk.

Raltlante chu an awmna ngai a, awm reng tura beisei an nih thu leh branch, group leh sub-headquarters YMA hruaitute'n mahni huam chhunga raltlante dinhmun zir chiang a vil reng tura beisei an ni a. Zofate an nih avangin tanpui an ngaih chuan theihtawpa tanpui turin an ngen bawk a ni.

<><><>

HAILSTORM

Nizan thim hlina nasa taka rial tla chuan East Phaileng leh a khaw thenawm Pehlawn khua-ah in 169 a deng chhia.

Aizawl district-a East Phaileng VCP Pu Ngaihawma hnen atanga thu dawn danin an khua-ah hian minute 10 chung vel rial tam tak a tla a, hei hian in 121 a deng chhia a. In 7 chu luah tlak loh khawpin a deng chhia a, a dang pawh ruah a sur emaw, rial a tla leh emaw a nih chuang luah tlak loh tur deuh vek niin a sawi. Vawiin khan kohhran awm zawng zawngin biak-in kharin hnatlang an huaihawt a, a theih ang angin in chhiate hi an thawm tha a. An khua a rangva lei tur awmin siamthatna tur a daih loh avangin naktuk lama hnatlan zawm an tum thu a sawi. Pehlawn khua-ah pawh hriat theih chinah rial tla-in in 48 a deng chhia a. Pehlawn VCP Pu Sakhmingmawi-a'n a sawi dan chuan ruah lo sur leh chuan, in 8 chu awmna tlak a ni loving a ti.

East Phaileng a rial tla hi a tam hrim hrim bakah a lian a, a then chu ar-la tui tiat vel lai niin an sawi a ni.

Hetih lai hian nimin flai dar 5:30 vela Kolasib district a thli tleh, ruah sur leh rial tla avangin Kolasib leh a chhehvelah in chhia thahnem tak a awm a, heng zingah hian kar leh Ningani zan atanga Pathianni zan thleng UPC (NEI) Gen. Conference vawi 56-na, Kolasib Vengthar UPC Biak in bula Pandal sak zawh thawkhat tawh chu a tlu sawp a, Pandal tlu sawp hi vawiin chawhma inkhawm ban atang khan seng hawiin, chawhnu atang khan a thar sa turin bul tan leh a ni. Vawiin vek khan UPC (NEI) Gen Supdt Rev K. Laldusanga, Gen Secretary Rev C. Lalthantluanga leh Gen Treasurer Rev C. Lalmuanpuia te chuan a hmunah tlawh in, Organising Comtt hruaitute nen an thukhawm a, inkhawmpui hi a hun leh hmun ngaiah nghah tho tum ni se, Pandal pawh a hmun ngaiah theihtawp chhuahin sak that leh ni se, an ti a, vawiin flai lam atang khan Kolasib Sub-Hqrs YMA Pandal ruhrel hmangan hmalak chhunzawm nghal a ni.

Pandal sak hna hi Tripura Dharmanagar lam a hnam dangten an sa a, a chung chei mawi leh hna tlem te chauh hmabak a awm tawh tih in hetiang chhiate hi a thleng a, Pandal satute pawh zanin hian an khua atangin an lo let chhoh leh beisei a ni.

<><><>

EVMS/VVPATS IN STRONG ROOMS

Mizoram Lok Sabha bial inthlanna a vote flate chu Aizawl leh district dang 10-a pindan awmkhauh chhungah dah luh kim vek a ni tawh a, venhimna khauh tak ruahmanna hnuai a ven a ni.

Additional Chief Electoral Officer Pu H. Lianzela'n Akashvani Aizawl a hrilh danin Zirtawpni a polling station 1,276 a inthlanna buaipuitute chuan an district khawpui thleng kim vek tawhin EVM leh VVPAT te chu venhimna

khauh tak hnuai-ah Aizawl leh district khawpui 10 dangah pindan awmkhauh chhunga dah kim vek a ni tawh. vote tlate hi ramchhung hmun dangte rualin June ni 4 khian chhiar a ni dawn a. Counting Centre 13 awmin Counting Hall 40 a awm ang a, Assembly bial pakhata vote tla zel kha counting hall pakhatah chhiar a ni dawn a ni. Nimin khan EVM leh VVPAT a vote tla zat hi endik (scrutiny) hna thawh a ni a, nimin vek khan zawh fel nghal a ni. Scrutiny tih zawh hian vote awm zawng zawng nuai 8, sing 5, sang 6 leh 364 atangin vote nuai 4, sing 8, sang 7 leh 103 a tla a. Vote tla zat hi za zela 56 point 87 a ni. Mipa nuai 2, sing 4, sang 1 leh 213 leh hmeichhia nuai 2, sing 4, sang 5 leh 800 in vote an thlak a. Postal Ballot hmanga vote tla leh Electronically Transmitted Postal Ballot System (EPBS) hmanga vote tla te chhiar tel a la ni lo.

Kumina Lok Sabha inthlan vote thlakna-ah hian kum dang ngaihtuahin EVM leh VVPAT chhia thlak ngai a tlem ta hle a. Mizoram pumah EVM a Ballot Unit (BU) leh Control unit 10 ve ve chauh thlak ngai a awm a. VVPAT 25 thlak ngai a awm bawk a. Kumin inthlanah hian Electronics Corporation of India Limited (ECIL)-in EVM tha leh rintlak zawk an siam chhuah hmangin Mizoram pumah vote thlak a ni.

<><><>

CENTURIAN VOTERS

Lok Sabha inthlanpui neihzawh takah khan Lawngtlai District ah hriattheih chinah Kum 100 chunglam mi pahnihin vote an thlak.

Lawngtlai East Assembly Segment huamchhung, Pangkhua-ah kum 116 mi ni a sawi, Pi Famiangi chuan April 8 khan an In lamah vote a thlak a. Polling Party ten kal chilhin a vote thlak hi an buaipui a. Pi Famiangi hian nikum November 7 a Assembly inthlanpui neih ah khan Polling Booth a kalin Vote a lo thlak tawh bawk. Pangkhua Village Council Member te hnen atanga Lawngtlaia kan Corr Lalngheta Ralte in thu a dawn danin, Pi Famiangi hi a EPIC ah chuan kum 1920 a piang anga ziahluh ni mah se, EPIC siam lai vel hian a pian kum dik tak hriat a ni lova, rin thuin a pian kum hi dah a nih thu an sawi a. Pangkhua khawtlangin Pi Famiangi kum hi an theih ang anga kum upa lam te leh a fate bia a an chhut danin kum 1910 hnulama piang chu nitheia an ngaih loh thu an sawi. Sorkar chhinchhiahna lama a lan dan erawh chuan Pi Famiangi hi Kum 1920 April ni 7 a piang anga chhinchhiah a ni.

Lawngtlai West Assembly Segment huamchhung, Lawngtlai College Veng South Polling Booth-ah Kum 104 a upa Pu Thanglianhluma College veng chuan April 19 khan vote a thlak a, Pu Thanglianhluma hi kum 1920 March ni 25 a piang anga chhinchhiah a ni.

<><><>

LS 2ND PHASE CAMPAIGNING

Lok Sabha inthlanpui thawh hnihna atan campaign theihna hun, ni li chauh a awm tawh avangin party tin-te, thahnemngai takin an campaign a, thawh hnihnaah hian Kerala-a seat awm zawng zawng 20, seat 28 awmna Karnataka-a seat 14-ah, Rajasthan-a seat 13, Uttar Pradesh leh Maharashtra-a seat 8 ve ve, Madhya Pradesh-a seat 7, Assam leh Bihar-a seat 5 ve ve, West Bengal leh Chhattisgarh-a seat 3 ve ve leh Tripura leh Jammu & Kashmir-a seat 1 ve ve-ah tun kar Zirtawpni-ah vote thlak a ni ang.

<><><>